

Requiem da Fauré

Il Chor claustral da Mustér se presenta per la 40avla gada a Cuera

■ (anr/ff) Gia per la 40avla gada se presenta il Chor dil gimnasi claustral da Mustér ella baselgia dalla s. Crusch a Cuera. La dumengia vargada han ils giuvenils cantau il Requiem da Gabriel Fauré. In grond auditori ei staus fascinaus dallas bialas melodias ed ha engraziu cun in extendiu applaus. Il concert annual vegn numnaus en claustra da Mustér «Churer Tag» ed ils conventuals, ils scolasts dil gimnasi ed ils students san tgei muntada quei di ha. Ils responsabels dil gimnasi claustral muossan cun quei manifest il fretg da lur lavur pedagogica culs giuvenils scolars. Per ils students munta il concert ina biala variasiun en lur mintgadi da scola. Per numerus anteriurs scolars, ils «Alt Disentiser», ei il di da concert adattaus per s'entupar culs cumpogns d'antruras. Quei che avat *Pankraz Winiker* ha iniziàu avon 40 onns ei daventau tradiziun.

Gabriel Fauré e si' ovra meisterila

Clau Scherrer, il dirigent dil chor dils gimnasiasts, ha eligiù quell'ovra ord la raschun che quei seigi ina bellezza musica. Aschia s'exprima el envièrs l'anr ed aschunta in'ulteriura finamira: «Jeu hai vuliù mirar co ils giuvenils students reage-schan sin quella musica.» Tgi che ha tedlau las produzioni ha saviu constatar che la generasiun giuvna ha il sensori positiv per bialas melodias. Lur vuschs genuinas han dau al Requiem l'expressiun giavischada ed attratg l'attenziun digl auditori entiramein ell'acziun dil cuntegn d'in Requiem. Quei ei semantestau suenter il finale «in Paradisum», in pulit mument ei tut stau tgeu, negin vuleva bandunar la meditaziun profunda ella quala quei cant magnific haveva transferiu ils presents. Fauré dera buca tema e sgarschur cun sia messa da la drama. La drama maunca ed enstagl d'in Diu castigant aulzan ils tuns liberonts dil «Liberate me» igl auditor en sferas tarlischantas, celestias.



In maletg imposant: Il Chor dil gimnasi claustral cun siu dirigent Clau Scherrer ella baselgia dalla s. Crusch a Cuera.

FOTO P. DUFF

Musica e cant che muentan

Il chor ha mess accents cun l'intunaziun schubra allas melodias pretensiusas. All'entschatta dil Requiem dera il cant unisono l'atmosfera dad oraziuns melodiusas, senza esser recitadas, per el proxim mument sereparter en quater tochen sis vuschs. Buca tema, mobein consolaziun e fidonza empermetta igl introitus cul giavisch «exauda mi' oraziun». Ils giuvenils han giu in fin sensori per il cant romantic da Fauré. Els ston buca contonscher cunfin ella forza, tonpli san els exprimer cordoli e speranza. Clau Scherrer ha schau cantar a moda retenida ed ha contonschiu variasiun cun pianos e fortes ed aschia dau la fina e gesta expressiun al cuntegn. Cun spontanitad han ils cantadurs rispundi

sin mintga segn fin dil dirigent. Las vuschs giuvnas han colurau la produziun e lur plascher ha dau l'intuiziun duida all'ovra.

Temps da raccolta

Igl orchester da professiun ha sunau sia part cun la retenientscha giavischada. Scherrer ha eligiù ina formaziun da pign diember. Quei ei stau sufficient, pertgei l'acustica in baselgia dalla s. Crusch supporta buc orchesters gronds. La harpa, sunada da *Kathrin Bamert*, ha surpriu ina impurtonta rolla el Requiem ed era dad accompagnar las solistas *Judith Scherrer* e *Rilana Cadruvi* ellas canzuns «En Prière» ed «Ave Verum». Il bariton *Marian Krejčík* ha cantau las parts solisticas dil Requiem. Frater *Stefan Keusch*,

igl organist claustral, ha sunau cun perschasiun ina part impurtonta ellas ovras dil concert. Ils solists ein stai integrai egl entir ensemble concertont. Briglant han *Judith*, *Rilana* e *Marian Krajcik* cantau lur parts solisticas per silsuenter seplazzar ellas retschas dil chor per dar sustegn. Dirigent Clau Scherrer astga esser satisfats dils fretgs da sia lavur. Sco el scriva ella biala brochura da concert ei quei il temps da raccolta. Igl ei in privilegi da luvrar cun glied giuvna el ravugl d'ina claustra. Far musica promovla la personalitad ed il senn da solidaritad tier ils giuvenils. Quella formaziun humanistica ei cuntegn da sia lavur, bein ina engrazieivla e biala missiun per el ed ils responsabels dil gimnasi dalla claustra da Mustér.

Sur Giusep Alig, Vrin, ei morts

■ (anr/gc) Gest il di dalla fiasta da siu sogn patrùn, s. Giusep, ils 19 da mars, ei sur Giusep Alig, da Vrin, morts a Flem ella vegliadetgna dad 86 onns ch'el ha cumplenu dacuort. Sur Giusep Alig ei staus in fideivel, engaschau e nunstunclenteivel pastur dallas olmas sin divers camps – ton en Svizra sco egl exteriur. Avon gest 60 onns, la stad 1952, eis el vegnius ordinaus spiritual ed ha giu messa nuviala a Vrin (leu ha el dil reminent celebrau l'emprema da quater primizias en successiun). Suen-ter zacons onns sco caplon dalla Cuort a Cuera – ei fuva dil temps che siu grond convischin uestg Rest Giusep Caminada era silla sedia da s. Leci – eis el daventaus 1956 caplon dils luvrers, occupai vid la construcziun dils implants dall'ovra electrica Reinanteriur (ORA), pastorond da Rabius anora. 1967 serenda sur Giusep Alig sco spiritual ella missiun a San Sebastian (Columbia). Leu operescha el cun sia collaboratura, la media Annamaria Anderhub, menond ton la missiun sco il spital. Quei cuoz tochen 1983, cura ch'ei fuva vegniu memia prigus da viver per els leuen.

Essend sia pleiv nativa da Vrin en Lumnezia da quei temps vacanta surpren sur Giusep Alig la pastoraziun da Vrin e Degen ed ei denteren era plevon-administratur da Lumbrein. Sut il tetg dalla casa-pervenda a Vrin – bein enzatgei singular – ha ei dau quels onns ton ina pratica pastoral sco medicina – omisus survetschs fetg apprezzai. 2009 seretrai sur Giusep Alig e serenda en Casa da vegls a Flem.



Sur Giusep Alig veva dun da malegiar, ch'el applicava principalmein per instrucziun religiua en scola, mo oravontut ina buna plema. Savens ha el rapportau sur da sia lavur missiunara, e la veta insumma ellas Andas sidamericanas, ella «Gasetta Romontsch», el «Calender Romontsch» ed era en cudischets, edi dall'ovra svizra da lectura per la juventetgna (OLS).

La sepultura da sur Giusep Alig ha liug venderdis, ils 23 da mars 2012 allas 14.00 a Vrin.

«Chorstudio» a Glion

■ (anr) Dils 14–21 da fenadur 2012 vegn arranschau ella Casa da sentupada dalla claustra da Glion in «Chorstudio». Atgnamein eisi in jamna da vacanzas musicalas per cantaduras e cantadurs interessai. Sut la direziun da *Mario Schwarz* vegn luvrau en in'atmosfera emperneivla vid ils pli bials chors ord operas da Händel, Mozart, Haydn, Beethoven e Verdi. Responsabla per la scolaziun dalla vusch e cant ei la solista *Muriel Schwarz*, feglia da Mario Schwarz. Ella vegn accompignada al clavazin da *Polina Lubchanskaya*. Sco usitau vegn concludiu cun in concert ell'aula dalla claustra a Glion.

Annunzias: Chorstudio, Caum postal 349, Rorschacherstrasse 107, S. Gagl (tel. 071 245 11 58 ni e-mail: chorstudio@bluewin.ch)

Affons contan per affons

Concert da benefeci en favur dil project da musica Guri dallas soras dominicanas da Glion

■ (cp) Las soras dominicanas da Glion s'engaschan pil project da musica Guri en Brasilia. Cun varga 51 000 scolars ei quei il pli grond program social-cultural dalla Brasilia. Ils 31 da mars ed igl 1. d'avrel 2012 dat ei in concert da benefeci ella sala da cultura a Trun. Avon varga 10 onns han las soras dominicanas da Glion fundau il project Cesim en Brasilia. Cun quel sustegnan ed accompognan ellas ils colonists e lur famiglias e scaffeschan aschia in center social che ha quitau mintga gi da 260 scolars. Il 2010 han ins dumandau la direziun dil Cesim sch'ei fussi pusseivel da metter a disposiziun las localitads pil project da musica Guri. Per las soras eis ei stau clar che quella

purschida musicala cumpletescha a moda perfetga il program exitent dil Cesim.

Instrucziun musicala per in meglier avegnir

Il project da musica Guri possibilitescha als affons dad empernder in instrument ni da frequentar lecziuns da cant parallel tier la scola obligatorica. Ils affons emperndan d'enconuscher differents stils da musica – naven da popular tochen a folcloristic e tradiziunal. Aschia survegnan ils affons in repertori variont e multifar che gida era a salvar las ragischs culturalas dall'atgna cuminonza. La finamira dil project da musica Guri ei da dar als scolars in svilup human cumplessiv.

Varga 51 000 scolars

Il project Guri dat ei en 310 marcaus dalla Brasilia. En 366 scolars vegnan varga 51 000 scolars instrui. Per vegnir recepi el project Guri ston ils scolars buca haver enconuschientschas musicalas preliminaras. Els ston sulettamein esser denter 6 e 18 onns e confirmar ch'els van regularme in scola.

Collavuraziun dallas Dominicanas da Glion

Metter a disposiziun las localitads dil Cesim ei enzatgei impurtont che cumpletescha il project da musica Guri a moda preziusa. Ell'instrucziun suenter scola san ils scolars frequentar lecziuns

supplementaras. Els san absolver cuors da PC, far lavurs manilas ni d'artisanadi. En cuors dalla sera han ils geniturs la pussevividad da sescolar vinavon.

Concert da benefeci

Sonda, ils 31 da mars e dumengia, igl 1. d'avrel 2012 datti in concert da benefeci en favur da quei project. Gruppas da giug, da cant e gruppas instrumentalas dalla Scola da musica Surselva e las gruppas da sault Movis da Muster contan e sunan e sco «Special Guest» igl ensemble Krumbambuli. Il concert entscheiva allas 17.00 ella sala da cultura a Trun. L'entrada ei libra. Ei dat ina collecta.



Il project da musica Guri possibilitescha als affons dad empernder in instrument ni da frequentar lecziuns da cant.



FOTOS MAD